

**Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ԽՈՍՔԸ ՇՈՒՇԻՒ ՍՈՒՐԲ ԱՄԵՆԱՓՐԿԻՉ ԵԿԵՂԵՑՈՒՄ**

(Շուշի, 14 ապրիլի, 2016 թ.)

*«Եւ զխորհուրդն զոր խորհիք
խափանէ Տէր, զի Աստուած ընդ մեզ է»
(Ժամագիրք):*

*Մեծարգո՛ նախագահ Լեոնային Ղարաբաղի Հանրապետության,
Սիրելի՛ բարեպաշտ ժողովուրդ, քաջարի, հաղթող ժողովուրդ.*

Այսօր Արցախի օրհնյալ հողում՝ Շուշիի Ղազանչեցոց Սուրբ Ամենափրկիչ եկեղեցում, գոհաբանական աղոթք բարձրացրինք առ Աստված, որ հաղթանակով պսակեց հայրենյաց պաշտպան մեր զավակների պայքարը Արցախ ներխուժած թշնամու դեմ՝ խափանելով մեր ժողովրդի ազատ ապրելու իրավունքին բռնանալու դավադիր խորհուրդները:

Այս դժվարին օրերին, երբ լարվածությունն ու պատերազմի սպառնալիքը դեռ չի փարատվել, Մենք մեր հոգեւոր եղբոր՝ Արամ Ա. Մեծի Տանն Կիլիկիո Կաթողիկոսի հետ ցանկացանք այցելել Արցախի մեր ժողովրդին, Հայրապետական Մեր օրհնությունը եւ գնահատանքը բերել ձեզ, որ առ Աստված հավատով ու արի ոգով հաստատուն կանգնած եք հայրենի հողին, անձնվիրաբար պաշտպանում եք հայրենիքի սահմանները: Արդարեւ, չկա ավելի մեծ շնորհ ու մխիթարություն Հայրապետիս համար, քան լինել հարազատ ժողովրդի կողքին իր պայքարի այս նվիրական պահին, քաջալերել նրան՝ հավատարմությունը պահելու հայրենիքին, քրիստոնեական իր հոգուն, ազգի իղձերին ու լուսավոր գալիքի տեսիլքին: Ազգը գոյություն ունի այնքան ժամանակ, քանի դեռ տեսիլք ունի եւ պայքարում է հանուն դրա իրագործման: Ասվածի լավագույն ապացույցը Արցախի հանրապետությունն է, որը ոչ այլ ինչ է, եթե ոչ մեր ժողովրդի ազատ ապրելու դարավոր երազանքի մարմնացումը:

Մեր հոգին լի է արդար հպարտությամբ, քանզի մեր բանակի սահմանապահ միավորումները, ինչպես եւ Արցախի մեր ժողովուրդը աներկ-

յուղ դիմակայեցին ադրբեջանական զորքերի հարձակմանը, ետ մղեցին սպառազինությունները գերազանցող հակառակորդին, որի մեջքին անսքող կանգնած է ցեղասպան Թուրքիան: Առաջին իսկ օրից դրսևորվեց մեր բանակի մարտունակությունն ու քաջարի ոգին, մեր զինվոր զավակները ցուցաբերեցին հերոսության բացառիկ օրինակներ: Նրանցից ոմանք իրենց ծաղկուն կյանքը, պայծառ երազները նվիրեցին հայրենիքին, մեզ՝ ապրողներին, գալիք սերունդներին:

Սիրելինե՛ր, հայրենյաց սիրո ոգին, Արցախից տարածվելով, այսօր համախմբում եւ միավորում է մեր ողջ ժողովրդին ի սփյուռս աշխարհի: Հայաստանից, աշխարհի բոլոր կողմերից կամավորներ են ժամանում Արցախ, շարունակվում են հանգանակությունները՝ ի խնդիր հրետանակոծված մեր բնակավայրերի վերակառուցման, տուժած մեր զավակների աջակցության, մեր բանակի զորացման եւ սահմանների պաշտպանության: Անկախ հեռավորությունից՝ ամեն հայրուղի իր նյութական եւ բարոյական սատարումով, մեր ժողովրդի իրավունքների պաշտպանության ջանքերով շտապում է լինել Արցախի կողքին, Արցախի զինվոր: Առ հայրենին սիրո, հանձնառության ու զոհողության այս ոգին է զորավոր այն ուժը, որ մեր ժողովրդին դարձնում է աննկուն ամեն տեսակ փորձությունների առաջ: Այս ոգին ինքնաբերական է, մարդկային որեւէ ջանք ի զորու չէ նման ոգեւորություն ստեղծել: Միայն հավատքից ծնված նվիրումը կարող է այսպիսի ներշնչում առաջացնել հոգիների մեջ: Այս ոգին մեր ժողովրդի ինքնության նկարագիրն է, դիմագիծը, որի շնորհիվ դարերի հողմերին հանդիման գոյատևել է, գտել վերածնվելու ուժ եւ ստեղծելու, արարելու եռանդ:

Անկախության 25 տարիներին մենք ականատես ենք Արցախի իրական վերածննդին: Ականատես ենք, թե ինչպես է Արցախի հայությունն իր աշխատանքով ու վաստակով շենացնում հայրենի երկիրը, կառուցում իր ազատ նոր կյանքը, բարձրացնում իր եկեղեցիները, իր դարավոր սրբավայրերը, ապրում քրիստոնեական արժեքներով, մարտնչում խաղաղության եւ արդարության համար:

Արդար է մեր պայքարը, սիրելիներ՛ը: Մեր ժողովուրդը գենք է բարձրացնում իր հայրենիքի, իր ազատ եւ խաղաղ կյանքի համար: Այս գիտակցությամբ են հայ մայրերը պատերազմ ճանապարհում իրենց որդիներին, կինը՝ ամուսնուն, քույրը՝ եղբորը: Ասածո ողորմությամբ մենք 25-ամյա ազատության սերունդ ունենք այսօր, երիտասարդություն, որ անձնվիրումով միանում է մեր ժողովրդի ազատ ապրելու իրավունքի



Շուշիի Սուրբ Ամենափրկիչ Ղազանեցոց եկեղեցի (ԺԹ. դար)



Պահպանենք մեր միաբանությունը, պահենք մեր զգոնությունը:
Սիրենք միմյանց, մեր ուժը մեր եղբայրության եւ միասնության մեջ է:
Մեր հույսը Նախ մենք ենք եւ մեր Աստված
(Ն. Ս. Օ. Տ. Տ. Գաբրեղին Բ. Կաթողիկոս Ամենայն Հայոց)



Ազատ ապրելու իր արդարությունը Արցախը եւ Նրա հետ
մեր ժողովուրդը պիտի շարունակի պաշտպանել մինչեւ հաղթական ավարտ,
մինչեւ Լեռնային Ղարաբաղի Հանրապետության միջազգային ճանաչում
(Ն. Ս. Օ. Տ. Տ. Գաբրեղին Բ. Կաթողիկոս Ամենայն Հայոց)

պաշտպանություն պայքարին, մեր ժողովրդի խաղաղ ու բարօր կյանք կերտելու ջանքերին: Ազատ ապրելու իր արդարությունը Արցախը եւ նրա հետ մեր ողջ ժողովուրդը պիտի շարունակի պաշտպանել մինչեւ հաղթական ավարտ, մինչեւ Լեռնային Ղարաբաղի Հանրապետության միջազգային ճանաչում: Եւ թող Աստված շուտով արժանացնի այդ օրվան՝ նայելով մեր ժողովրդի հավատքին, նվիրումին, ազգաչեն ու հայրենանվեր գործերին, քանզի ինչպես սաղմոսերգուն է ասում, «արդար է Տէրը, արդարութիւն է սիրում, ճշմարտութեանն է նայում երեսը նրա» (Սաղմ. Ժ. 8):

Արդարություն եւ ճշմարտություն է Արցախի ազատությունը: Արդարություն եւ ճշմարտություն է Արցախի հաղթանակը:

Արդ, ամուր ու անսասան մնանք հավատքի մեջ. հավատքի մեջ, որ Աստված մեզ հետ է: Պահպանենք մեր միաբանությունը, պահենք մեր զգոնությունը: Սիրենք միմյանց, մեր ուժը մեր եղբայրության եւ միասնության մեջ է: Մեր հույսը նախ մենք ենք եւ մեր Աստված: Ամենքս՝ ի զոհողություն ի սեր հայրենիքի, զոհողություն՝ ի սեր հայ ընտանիքների, զոհողություն՝ ի սեր մեր անկախության եւ, ամենակարեւորը, զոհողություն՝ ի սեր Աստծո: Այսպես կարող պիտի լինենք պաշտպանել եւ միջազգային ճանաչման առաջնորդել Արցախի մեր ժողովրդի ազատ ապրելու արդար իրավունքը:

Վերստին Մեր զնահատանքը եւ օրհնությունն ենք բերում ձեզ, սիրելի՛ բարեպաշտ զավակներ, Հայոց բանակի քաջ մարտիկներ, մեր զորակցությունը՝ Արցախի բարեխնամ իշխանություններին՝ ի գլուխ նախագահ Տիար Բակո Սահակյանի, մեր խրախույսն ու քաջալերանքը՝ մեր Եկեղեցու բարեջան սպասավորներին, սիրելի առաջնորդ Պարգեւ Սրբազանին: Տոկունություն եւ հաղթություն ձեզ, քաջ արցախցիներ:

Ի խորոց սրտի Հայրապետիս աղոթքն է, որ Բարերար Աստված շուտափույթ ապաքինում պարգեւի վիրավոր մեր զավակներին, երկնային լուսեղեն հարկերում ընդունի հոգիները մարտերում զոհված մեր զինվորների եւ խաղաղ բնակիչների, ոգու արիություն ու սփոփանք շնորհի նրանց ընտանիքներին եւ հարազատներին: Թող ամենակարող Աստված խաղաղություն պարգեւի Արցախ աշխարհին ու համայն մեր ժողովրդին ի սփյուռս աշխարհի եւ օրհնի հայրենաչեն ջանքերը ազգիս, որ միշտ «հայրենյաց շողա արեւ»:

Թող Տիրոջ խաղաղությունը, ողորմությունն ու շնորհները լինեն մեզ հետ եւ համայն աշխարհի, այսօր եւ միշտ. ամեն: